

四庫全書

集部

欽定四庫全書

集部

漢魏六朝百三家集卷一百十一上

詳校官庶吉士臣謝恭銘

主事銜臣徐以坤覆勘

總校官檢討 臣何思鈞

校對官編修 臣祖之望

謄錄監生 臣蕭肇鵬

欽定四庫全書

漢魏六朝百三家集卷一百十一上

庾信集題詞

周滕王適序庾開府集云子山竅擅文詞尤工
詩賦誄潘安而碑蔡邕箴楊雄而書阮籍也稱
重至矣庾氏家世南陽聲譽獨步子山父子出
入禁闥為梁文人崔航之戰倒徒先奔違才易
務任非其器後羈長安臣于宇文陳帝通好請

還終留不遣雖周宗好士滕趙賞音築宮虛館
交齊布素而南冠西河旅人發嘆鄉關之思僅
寄于哀江南一賦其視徐孝穆得返舊都奚啻
李都尉之望蘇屬國哉子山在梁每一文出京
都傳誦初使北方人頗輕之讀枯樹賦始知敬
重盛名易地橘枳改觀難為淺見寡聞者道也
史評庾詩綺豔杜工部又稱其清新老成此六
字者詩家難兼子山備之玉臺瓊樓未易幾及

文與孝穆敵體辭生于情氣餘於彩乃其獨優
令狐謨史詆為淫放輕險詞賦罪人夫唐人文
章去徐庾最近窮形寫態模範是出而敢于毀
侮殆將諱所自來先縱尋斧歟

目錄

賦

三月三日華林園馬射賦

有序

哀江南賦

有序

傷心賦有序

小園賦

春賦

七夕賦

蕩子賦

竹杖賦

叩竹杖賦

象戲賦

鏡賦

燈賦

對燭賦

枯樹賦

鴛鴦賦

表

賀傳位皇太子表

賀平鄴都表

賀新樂表

請功臣襲封表

為杞公讓宗師驃騎表

為閻大將軍乞致仕表

代人乞致仕表

為晉陽公進玉律秤尺斗升表

進象經賦表

齊王進蒼烏表

齊王進白兔表

齊王進赤雀表

啓

謝滕王集序啓

謝周明帝賜絲布等啓

答趙王啓

謝趙王示新詩啓

謝趙王賚絲布等啓

謝趙王賚絲布啟

又謝趙王賚息絲布啟

謝趙王賚犀帶等啟

謝滕王賚巾啟

謝趙王賚白羅袍袴啟

謝趙王賚米啟

謝趙王賚乾魚啟

謝趙王賚雉啟

謝趙王賚馬并織啟

謝滕王賚馬啟

謝滕王賚猪啟

書

為梁上黃侯世子與婦書

移文

移齊河陽執事文

又移齊河陽執事文

移虜留使文

教

答移市教

連珠

擬連珠四十四首

漢魏六朝百三家集卷一百十一目錄上

欽定四庫全書

漢魏六朝百三家集卷一百十一上

明張溥輯

庾信集

賦

三月三日華林園馬射賦

有序

臣聞堯以仲春之月刻玉而遊河舜以甲子之朝披圖而巡洛夏后瑤臺之上或御二龍周王玄圃之前猶駢

八駿我大周之創業也南正司天北正司地平九黎之
亂定三危之罪雲紀御官鳥司從職皇王有秉厯之符
玄珪有成功之瑞豈直天地合德日月光華而已哉皇
帝以上聖之姿膺下武之運通乾象之靈啟神明之德
夷典秩宗見之三禮夔為樂正聞之九成克已備於禮
容威風總於戎政加以卑躬菲食阜帳綈衣百姓為心
四海為念西郊不雨即動皇情東作未登彌迴天眷兵
革無會非有待於丹鳥宮觀不移故無勞於白鷺銀瓮

金船山車澤馬豈止竹葦兩草共垂甘露青赤二氣同
為景星雕題鑿齒識海水而來王烏弋黃支驗東風而
受吏於時玄鳥司歷蒼龍御行雋獻氷開桐華萍合皇
帝幸於華林之園玉衡正而泰階平閭闔開而勾陳轉
千乘雷動萬騎雲屯落花與芝蓋同飛楊柳共春旗一
色乃命羣臣陳大射之禮雖行袂襖之飲即同春蒐之
儀止立行宮裁舒帳殿階無玉壁既異河間之碑戶不
金鋪殊非許昌之賦洞庭既張承雲乃奏騶虞九節狸

首七章正飾五彩之雲壺寧百福之酒唐弓九合冬幹
春膠夏箭三成青莖赤羽于是選朱汗之馬較黃金之
埒紅陽飛鵲紫鷺晨風唐成公之驕驕海西侯之千里
莫不飲羽銜竿吟猿落雁鐘鼓震地埃塵漲天酒以壘
行餉繇鼎進綵則錦市俱移錢則銅山合徙太史聽鼓
而論功司馬張旃而賞獲上則雲布雨施下則山藏海
納實天下之至樂景福之歡欣者也既而若木將低金波
欲上天顧惟穆賓歌惟醉雖復暫離北闕聊宴西城即

同鄴水之朝更是岐山之會小臣不舉奉詔為文以管
窺天以蠡酌海盛德形容豈陳梗概

歲次昭陽月在大梁其日上巳其時少陽春史司職青
祇效祥徵萬騎於平樂開千門於建章屬車醞酒複道
焚香皇帝翊四圉於帝閑迴六龍於天苑對宣曲之平
林望甘泉之長坂華蓋平飛風鳥細轉路直城遙林長
騎遠帷宮宿設帳殿開筵傍臨細柳斜界祈年開鶴列
之陣靡魚鬚之旃行漏抱刻前旌載鳶河湄薙草渭口

澆泉棚雲五色的暈重圓陽管既調春絃實撫摠章協
律成均樹羽翔鳳為林靈芝為圃草銜長帶桐垂細乳
鳥轉歌來花濃雪聚玉律調鐘金鐸節鼓於是咀銜拉
鐵逐日追風并試長楸之埒俱下蘭池之宮鳴鞭則汗
赭入埒則塵紅既觀賢於大射乃頒政於司弓變三驅
而畫鹿登百尺而懸熊繁弱振地鐵驪躡空禮正六耦
詩歌九節七札俱穿五犯同穴弓如明月對棚馬似浮
雲向埒雁失羣而行斷猿求林而路絕控玉勒而搖星

跨金鞍而動月乃有六郡良家五陵豪選新迴馬邑之
兵始罷龍城之戰將軍戎服來叅武讌尚帶流星猶乘
奔電始聽鼓而唱籌即移竿而標箭馬噴沾衣塵驚灑
面石堰水而澆園花乘風而繞殿熊耳刻杯飛雲畫疊
水衡之錢山積織室之錦霞開司筵賞至酒正杯來至
樂則賢乎秋水歡笑則勝上春臺既而日下澤宮筵闌
相圓悵徙蹕之留歡眷迴鑒之餘舞欲使石梁銜箭銅
山飲羽橫弧於楚水之蛟飛鏃於吳亭之虎况復恭己

無為南風在斯非有心於蜚翼豈留情於戟枝唯觀揖讓之禮蓋取威雄之儀

哀江南賦

有序

粵以戊辰之年建亥之月大盜移國金陵瓦解余乃竄身荒谷公私塗炭華陽奔命有去無歸中興衛銷窮於甲戌三日哭於都亭三年囚于別館天衢周星物極不反傳變之但悲身世無處求生袁安之每念王室自然流涕昔桓君山之志事杜元凱之平生並有著書咸能

自序潘岳之文彩始述家風陸機之詞賦先陳世德信
年始二毛即逢喪亂藐是流離至于暮齒燕歌遠別悲
不自勝楚老相逢泣將何及畏南山之雨忽踐秦庭讓
東海之濱遂食周粟下亭漂泊高橋羈旅楚歌非取樂
之方魯酒無忘憂之用追為此賦聊以記言不無危苦
之詞唯以悲哀為主日暮途遠人間何世將軍一去大
樹飄零壯士不還寒風蕭瑟荆壁睨柱受連城而見欺
載書橫階捧珠盤而不定鍾儀君子入就南冠之囚季

孫行人留守西河之館申包胥之頓地碎之以首蔡威
公之淚盡加之以血釣臺移柳非玉關之可望華亭鶴
唳豈河橋之可聞孫策以天下為三分衆繞一旅項籍
用江東之子弟人唯八千遂乃分裂山河宰割天下豈
有百萬義師一朝卷甲芟夷斬伐如草木焉江淮無涯
岸之阻亭壁無藩離之固頭會箕歟者合從締交鋤耰
棘矜者因利乘便將非江表王氣終於三百年乎是知
併吞六合不免軼道之災混一車書無救平陽之戢鳴

呼山嶽崩頽既履危亡之運春秋迭代必有去故之悲
天意人事可以悽愴傷心者矣况復舟楫路窮星漢非
乘槎可上風颭道阻蓬萊無可到之期窮者欲達其言
勞者須歌其事陸士衡聞而撫掌是所甘心張平子見
而陋之固其宜矣

我之掌庾承周以世功而為族經邦佐漢用論衡而當
官稟嵩華之玉石潤河洛之波瀾居負洛而重世邑臨
河而晏安逮永嘉之艱虞始中原之乏主民枕倚於牆

壁路交橫於豺虎值五馬之南奔逢三星之東聚彼凌江而建國始播遷於吾祖分南陽而賜田裂東嶽而胙土誅茅宋玉之宅穿徑臨江之府水木交運山川崩竭家有直衡人多全節訓子見于純深事君彰於義烈新桀有生祠之廟河南有胡書之碣况乃少微真人天山逸民階庭空谷門巷蒲輪移譚講樹就簡書筠降生世德載誕貞臣文詞高于甲觀模楷盛于漳濱嗟有衡而無鳳歎非時而有麟既姦回之異匿終不悅於仁人王

予洛濱之歲蘭成射策之年始含香於建禮仍矯翼於
崇賢遊洊雷之講肆齒明離之胄筵既傾螽而酌海遂
側管以窺天方塘水白釣渚池圓侍戎韜于武帳聽雅
曲於文絃乃解懸而通籍遂崇文而會武居筮輶而掌
兵出蘭池而典午論兵於江漢之君拭玉於西河之主
于時朝埜歡娛池臺鐘鼓里為冠蓋門成鄒魯連茂苑
於海陵跨橫塘于江浦東門則鞭石成橋南極則鑄銅
為柱橘則園植萬株竹則家封千戶西賁浮玉南琛沒

羽吳歆越陰荆豔楚舞草木之藉陽春魚龍之逢風雨
五十年中江表無事王歆為蘇親之侯班超為定遠之
使馬武無預于甲兵馮唐不論於將帥豈知山嶽閭然
江湖潛沸漁陽有閭左戍卒離石有將兵都尉天子方
刪詩書定禮樂設重雲之講開士林之學譚刼燼之灰
飛辯常星之夜落地平魚齒城危獸角卧刁斗于滎陽
絆龍媒于平樂牢衡以干戈為兒戲搢紳以清譚為廟
略乘漬水以膠船馭奔駒以朽索小人則將及水火君

子則方成猿鶴弊革不能救鹽池之鹹阿膠不能止黃
河之濁既而魴魚頰尾四郊多壘殿狎江鷗宮鳴埜雉
湛盧去國餘艗失水見被髮于伊川知百年而為戎矣
彼姦逆之熾盛久遊魂而放命大則有鯨有鯢小則為
梟為獍負其牛羊之力肆其水草之性非玉燭之能調
豈璿璣之可正值天下之無為尚有欲于羈縻飲其琉
璃之酒賞其虎豹之皮見胡柯于大夏識烏卵于條支
豺牙密厲虺毒潛吹輕九鼎而欲問聞三川而遂窺始

則王子召戎姦臣介冑既官政而離邊遂師言而泄漏
望廷尉之逋囚反淮南之窮寇出狄泉之蒼鳥起橫江
之困獸地則石鼓鳴山天則金精動宿北闕龍吟東陵
麟鬪爾乃桀黠橫扇馮陵畿甸雍狼望于黃圖填廬山
于赤縣青袍如草白馬如練天子履端廢朝單于長圍
高宴兩觀當戟千門受箭白虹貫日蒼鷹擊殿竟遭夏
臺之旤終眎堯城之變官守無奔問之人干戚非平戎
之戰陶侃則空爭米船顧榮則虛搖羽扇將軍死綏路

絕重圍烽隨星落書逐鳶飛遂乃韓分趙裂鼓卧旂折
失羣班馬迷輪亂轍猛士嬰城謀臣卷舌昆陽之戰象
走林常山之陣蛇奔穴五郡則兄弟相悲三州則父子
離別護軍慷慨忠能死節三世為將終於此滅濟陽忠
壯身叅末將兄弟三人義聲俱唱主辱臣死名存身喪
敵人歸元三軍悽愴尚書多算守備是長雲梯可拒地
道能防有齊將之閉壁無燕師之卧牆大事去矣人之
云亡申子奮發勇氣咆勃寔總元戎身先士卒胄落魚

門兵填馬窟屢犯通中頻遭刮骨功業夭枉身名埋沒
或以隼翼鸚披虎威狐假沾漬鋒鏑脂膏原埜兵弱虜
強城孤氣寡聞鶴唳而心驚聽胡笳而淚下拒神亭而
亡戟臨橫江而棄馬崩于鉅鹿之沙碎于長平之瓦於
是桂林顛覆長洲糜鹿潰潰沸騰茫茫塲黷天地離阻
人神慘酷晉鄭靡依魯衛不睦競動天關爭迴地軸探
雀穀而未飽待熊蹯而詎熟乃有車側郭門筋懸廟屋
鬼同曹社之謀人有秦庭之哭爾乃假刻璽于關塞稱

使者之訓對逢鄂坂之譏嫌值郾門之征稅乘白馬而
不前策青騾而轉礙吹落葉之扁舟飄長風于上遊彼
鋸牙而鉤爪又巡江而習流排青龍之戰艦鬪飛燕之
船樓張遼臨於赤壁王濬下於巴丘乍風驚而射火或
箭重而回舟未辯聲於黃蓋已先沈于杜侯落帆黃鶴
之浦藏船鸚鵡之洲路已分於湘漢星猶看於斗牛若
乃陰陵失路釣臺斜趣望赤岸而沾衣艤烏江而不渡
雷池柵浦鵲陵焚戍旅舍無烟巢禽失樹謂荆衡之杞

梓庶江漢之可恃淮海維揚三千餘里過漂渚而寄食
託蘆中而渡水屈於七澤濱於十死嗟天保之未定見
殷憂之方始本不達於危行又無情於祿仕謬掌衛於
中軍濫尸丞於御史信生世等於龍門辭親同於河洛
奉立身之遺訓受成書之顧託昔三世而無慙今七葉
而始落泣風雨於梁山惟枯魚之銜索入歌斜之小徑
掩蓬藿之荒扉就汀洲之杜若待蘆葦之單衣於時西
楚霸王劍及繁陽鏖兵金匱較戰玉堂蒼鷹赤雀缺軸

牙檣沈白馬而誓衆負黃龍而渡江海潮迎艦江萍送
王戎車屯於石城戈船掩乎淮泗諸侯則鄭伯前驅盟
主則荀罃暮至剖巢燠穴奔魑走魅埋長狄於駒門斬
蚩尤於中冀然腹為燈飲頭為器直虹貫壘長星屬地
昔之虎據龍蟠加以黃旂紫氣莫不隨狐兔而窟穴與
風塵而殄悴西瞻博望北臨玄圃月榭風臺池平樹古
倚弓於玉女窻扉繫馬於鳳凰樓柱仁壽之鏡徒懸茂
陵之書空聚若夫立德立言謨明寅亮聲超於繫表道

高於河上更不遇於浮丘遂無言於師曠捐愛子而托人知西陵而誰望非無北闕之兵猶有雲臺之仗司徒之表裏經綸狐偃之惟王寔勤橫琱戈而對霸主執金鞭而問賊臣平吳之功壯於杜元凱王室是賴深於溫太真始則地名全節終則山稱枉人南陽較書去之已遠上蔡逐獵知之何晚鎮北之負譽矜前風颼凜然水神遭箭山靈見鞭是以熱熊傷馬浮蛟沒船才子併命俱非百年中宗之夷凶靖亂大雪冤恥去代邸而承基

遷唐郊而纂祀反舊章於司隸歸餘風於正始沈猜則
方逞其欲藏疾則自矜於已天下之事沒焉諸侯之心
搖矣既而齊交北絕秦患西起况背關而懷楚冀端委
而開吳驅綠林之散卒拒驪山之叛徒營軍梁滎蒐乘
巴渝問諸淫昏之鬼求之厭効之巫荆門遭廩延之戮
夏首濫遠泉之誅蔑因親以教愛忍飢樂於彎弧既無
謀於肉食非所望於論都未深思於五難先自擅於三
端登陽城而避險卧砥柱而求安既言多於忌刻實志

勇而形殘俱坐觀於時變本無情於急難地惟黑子城
猶彈丸其怨則黷其盟則寒豈冤禽之能塞海非愚叟
之可移山況以沴氣朝浮妖精夜殞赤烏則三朝夾日
蒼雲則七里圍軫亡吳之歲既窮入郢之年斯盡周舍
鄭怒楚結秦冤有南風之不競值西鄰之責言俄而梯
衝亂舞冀馬雲屯棧秦車於暢轂沓漢鼓於雷門下陳
倉而連弩渡臨晉而橫船雖復楚有七澤人稱三戶箭
不麗於六廩雷無驚於九虎辭洞庭兮落木去淞陽兮

極浦熾火兮焚旗貞風兮害蠱乃使玉軸揚灰龍文斫
柱下江餘城長林故營徒思籍馬之秣未見燒牛之兵
章慢支以轂走宮之奇以族行河無冰而馬渡關未曉
而雞鳴忠臣解骨君子吞聲章華望祭之所雲夢僞遊
之地荒谷縊於莫敖冶父囚於羣帥斫穿摺拉鷹鷂扯
攢冤霜夏零憤泉秋沸城崩杞嬭之哭竹染湘妃之淚
水毒秦涇山高趙陘十里五里長亭短亭飢隨蟄燕閭
逐流螢秦中水黑關上泥青於時瓦解冰泮風飛電散

渾然千里溜澠一亂雪暗如沙水橫似岸逢赴洛之陸
機見離家之王粲莫不聞隴水而掩泣向關山而長嘆
况復君在交河妾在清波石望夫而逾遠山望子而逾
多才人之憶代郡公主之去清河相揚亭有離別之賦
臨江王有愁思之歌別有飄飄武威羈旅金微班超生
而望返溫序死而思歸李陵之雙鳬永去蘇武之一雁
空飛若江陵之中否乃金陵之駸始雖借人之外力實
蕭牆之内起撥亂之主忽焉中興之宗不祀伯兮叔兮

同見戮於猶子荆山鵲飛而玉碎隨岸蛇生而珠死鬼
火亂於平林殤魂遊於新市梁故豐徙楚實秦亡不有
所廢其何以昌有媯之後將育於姜輸我神器居為讓
王天地之大德曰生聖人之大寶曰位用無賴之子弟
舉江東而全棄惜天下之一家遭東南之反氣以鶉首
而賜秦天何為而此醉且夫天道迴旋生民預焉余烈
祖於西晉始流播於東川洎余身而七葉又遭時而北
遷提挈老幼關河累年死生契闊不可問天況復零落

將盡靈光歸然日窮於紀歲將復始逼切危慮端憂暮
齒踐長樂之神皋望宣平之貴里渭水貫於天門驪山
迴於地市幕府大將軍之愛客丞相平津侯之待士見
鐘鼎於金張聞絃歌於許史豈知灞陵夜獵猶是故時
將軍咸陽布衣非獨思歸王子

傷心賦

有序

余五福無徵三靈有譴至於繼體多從夭折二男一女
並得勝衣金陵喪亂相繼亡歿羈旅關河倏然白首苗

而不秀頻有所悲一女成人長孫孩稚奄然玄壤何痛
如之既傷即事追悼前亡唯覺傷心遂以傷心為賦若
夫入室生光非復企及夾河為郡前途逾遠婕妤有自
傷之賦揚雄有哀祭之文王正長有北郭之悲謝安石
有東山之恨斯既然矣至若曹子建王仲宣傅長虞應
德璉劉韜之母任延之親書翰傷切文詞哀痛千悲萬
恨何可勝言龍門之桐其枝已折卷菰之草其心實傷
嗚呼哀哉賦曰

悲哉秋氣搖落變衰魂兮遠矣何去何依望思無望歸
來不歸未達東門之意空懼西河之譏在昔金陵天下
喪亂王室板蕩生民塗炭兄弟則五郡分張父子則三
州離散地鼎沸於袁曹人豺狼於楚漢或有擁樹罹災
藏衣遭難未設桑弧先空柘館人惟一丘亭遂千秋邊
韶永恨孫楚長愁張壯武之心疾羊南城之淚流痛斯
傳體尋茲世載天道斯憇人倫此愛膝下龍摧掌中珠
碎芝在室而先枯蘭生庭而蚤刈命之修短哀哉已滿

鶴聲孤絕猿吟腸斷羸博之間路似新安藤緘轡櫝
柝掩虞棺不封不樹惟棘惟藥天慘慘而無色雲蒼
蒼而正寒況乃流寓秦川飄飄播遷從官非官歸田
不田對玉關而羈旅坐長河而暮年已觸目於萬恨
更傷心於九泉至於三虎二龍三珠兩鳳並有山澤
之靈各入熊羆之夢望隴首而不歸出都門而長送
對寶盃而痛心撫玄經而流慟石華空服犀角虛簪
風無少女草不宜男烏毛徒覆獸乳空含震為長男

之宮巽為長女之位在我生年先凋此地人生幾何百
憂俱至二王奉佛二郝奉道必至有期何能相保淒其
零露颯焉秋草去矣黎民哀哉仲仁冀羊祜之前識期
張衡之後身一朝風燭萬古埃塵丘陵兮何忍能留兮
幾人

小園賦

若夫一枝之上巢父得安巢之所一壺之中壺公有容
身之地況乎管寧藜牀雖穿而可坐嵇康鍛竈既煖而

堪眠豈必連閨洞房南陽樊重之第綠墀青瑣西漢王
根之宅余有數畝弊廬寂寞人外聊以擬伏臘聊以避
風霜雖復晏嬰近市不求朝夕之利潘岳面城且適閒
居之樂況乃黃鶴戒露非有意於輪軒爰居避風本無
情於鐘鼓陸機則兄弟同居韓康則舅甥不別蝸角蚊
睫又足相容者也爾乃窮室徘徊聊同鑿坯桐間露落
柳下風來琴號珠柱書名玉栢有棠梨而無館足酸棗
而非臺猶得歌側八九丈縱橫數十步榆柳兩三行梨

桃百餘樹撥蒙密兮見窻行欹斜兮得路蟬有翳兮不
驚雉無羅兮何懼草樹溷淆枝格相交山為簣覆地有
堂均藏狸並窟乳鵲重巢連珠細菌長柄寒斃可以療
飢可以棲遲殷隘兮狹室穿漏兮茅茨簷直倚而妨帽
戶平行而礙眉坐帳無鶴支牀有龜鳥多閒暇花隨四
時心則歷陵枯木髮則睢陽亂絲非夏日而可畏異秋
天而可悲一寸二寸之魚三竿兩竿之竹雲氣蔭於叢
著金精養於秋菊棗酸梨酢桃桴李萸落葉半牀狂花

滿屋名為堊人之家是謂愚公之谷試偃息於茂林迺
久羨於抽簪雖有門而長閉實無水而恒沈三春負鋤
相識五月披裘見尋問葛洪之藥性訪京房之卜林草
無忘憂之意花無長樂之心鳥何事而逐酒魚何情而
聽琴加以寒暑異命乖違德性崔駰以不樂損年吳質
以長愁養病鎮宅神以薶石厭山精而照鏡屢動莊舄
之吟幾行魏顥之命薄晚間閨老幼相攜蓬頭王霸之
子椎髻梁鴻之妻焦麥兩甕寒菜一畦風騷騷而樹急

天慘慘而雲低聚空倉而雀噪驚懶嬾而蟬嘶昔早濫
於吹噓藉文言之慶餘門有通德家承賜書或陪玄武
之觀時參鳳凰之墟觀受釐於宣室賦垂楊於直廬遂
乃山崩川竭冰碎瓦裂大盜潛移長離永滅摧直轡於
三危碎平途於九折荆軻有寒水之悲蘇武有秋風之
別關山則風月悽愴隴水則肝腸斷絕龜言此地之寒
鶴訝今年之雪百靈兮倏忽菁華兮已晚不雪雁門之
踦先念鴻陸之遠非淮海兮可變非金丹兮能轉不暴

骨於龍門終低頭於馬坂諒天造兮昧昧嗟生民兮渾渾

春賦

宜春苑中春已歸披香殿裡作春衣新年鳥聲千種囀
二月楊花滿路飛河陽一縣併是花金谷從來滿園樹
一叢香草足礙人數尺遊絲即橫路開上林而競入擁
河橋而爭渡出麗華之金屋下飛燕之蘭宮釵朶多而
訝重髻鬟高而畏風眉將柳而爭綠面共桃而競紅影

來池裏花落衫中苔始綠而藏魚麥纔青而覆雉吹簫
弄玉之臺鳴佩淩波之水移戚里而家富入新豐而酒
美石榴聊泛蒲桃醅芙蓉玉盃蓮子金杯新芽竹笋
細核楊梅綠珠捧琴至文君送酒來玉管初調鳴絃暫
撫陽春淥水之曲對鳳迴鸞之舞更炙笙簧還移箏柱
月入歌扇花承節鼓協律都尉射雉中郎停車小苑連
騎長楊金鞍始被拓弓新張拂塵看馬埒分朋入射堂
馬是天池之龍種帶乃荆山之玉梁艷錦安天鹿新綾

織鳳皇三日曲水向河津日晚河邊多解神樹下流杯
客沙頭渡水人縷薄窄衫袖穿珠帖領巾百丈山頭日
欲斜三浦未醉莫還家池中水影懸勝鏡屋裏衣香不
如花

七夕賦

兔月先上羊燈次安覩牛星之曜景視織女之闌干於
是秦娥麗妾趙豔佳人窈窕名燕逶迤姓秦嫵朝妝之
半故憐晚飾之全新此時併捨房櫳共往庭中縷條繁

而貫矩針鼻細而穿空

蕩子賦

蕩子辛苦逐征行直守長城千里城隴水恒冰合關山
唯月明况復空牀起怨倡婦生離紗牕獨掩羅帳長垂
新箏不弄長笛羞吹當年桂苑昔日蘭閨羅敷總髮弄
玉初并新歌子夜舊舞前溪別後關情無復情奩前明
鏡不須明合歡無信寄迴紋織未成游塵滿牀不用拂
細草橫階隨意生前日漢使著章臺聞道夫壻定應迴

手巾還欲燥愁眉
卽剗開逆想行人至
迎前含笑來

竹杖賦

桓宣武平荊州外白有稱楚丘先生來詣門下宣武曰
名父之子流離江漢孤之責矣及命引進乃曰噫子老
矣鶴髮雞皮蓬頭歷齒迺是江漢英靈衡荆杞梓雖有
聞於十室幸無求於千里寡人有銅環靈壽銀角桃枝
開木瓜而未落養蓮花而不萎迎仙客於錦市送遊龍
於葛陂先生將以養老將以扶危先生笑而言曰中國

明於理義闇於知人心之憂矣惟我生民雖復踈條勁
柘促節貞筠杖端刻鳥角首圖麟豈能相予此疾將予
此身若乃世變市朝年移陵谷猿吟鷹厲風霜慘黯楚
漢爭衡袁曹競逐獸食無草禽巢無木於時無懼而慄
不寒而戰胡馬哀吟羌笳悽囀親友離絕妻孥流轉王
闕寄書章臺留釧寒關悽愴羈旅悲涼疏毛抵於增繳
脆骨被於風霜髮種種而逾短眉髟髟而競長是以憂
幹扶踈悲條鬱結宿昔倣醜俄然耆耄變田鳳於承宮

改陽文於駸茂潘岳秋興嵇生倦遊桓譚不樂吳質長
愁並皆年華未暮容貌先秋予此哀矣雖然有以非鬼
非魃乃心憂矣未見從心先求順耳伯玉何嗟丘明惟
恥拉虎捭熊余猶稚童觀形察貌子實悲翁別有九棘
龐眉三槐暮齒孔光謝病素逢致仕吳淠不朝楊彪喪
子明公此贈或非乖理先生乃歌曰秋藜促節白藿同
心終堪荷蓀自足驅禽一傳大夏空成鄧林

叩竹杖賦

沈冥子遊巴山之岑取竹於北陰嫵媚高節寂歷無心
霜風色古露染班深每與龍鍾之族幽翳沈沈文不自
殊質而見賞蘊諸鳴鳳之律制以成龍之杖枝條勁直
璘斌色滋和輪人之不重待羽客以相貽青春欲暮
白雲來遲謀於長者操以從之執末而獻無因自持諸
蔗雖甘不可以倚彼藜雖實不可以美未若處不材之
間當有用之始魯分以爵漢錫以年昔尚爾齒今優我
賢書橫几玉塵筵則函之以後拂之以前爾其摘芳林

治行樂軒除間尊卑之垂悅隨上下之遊紆夫寄根江南
淼淼幽潭傳節大夏悠悠廣野豈比夫接君堂上之
履為君座右之銘而得與綺紳瑤珮出芳房於蕙庭

象戲賦

觀夫造作權輿皇王厥初法凝陰於厚德仰冲氣於清
虛於是綠簡既開丹局直正理洞研幾原窮作聖若扣
洪鐘如懸明鏡白鳳遙臨黃雲高映可以變俗移風可
以莅官行政是以局取諸乾仍圖上玄月輪新滿日暈

初圓摸羽林之華蓋寫明堂之壁泉坤以為輿剛柔卷
舒若方鏡而無影似空城而未居促成文之畫亡靈龜
之圖馬麗千金之馬符明六甲之符於是摛芴當次依
辰就席回地理於方珪轉天文於圓璧分荆山之美玉
數藍田之珉石南行赤水之珠北使玄山之策居東道
而龍青出西闕而馬白既舒玄象聊定金秤昭日月之
光景乘風雲之性靈取四方之正色用五德之相生從
月建而左轉起黃鍾而順行陰飜則顧兔先出陽變則

靈烏獨明況乃豫遊仁壽行樂徽音水影搖日花光照
林乍披圖而久玩或開經而熟尋雖復成之於手終須
得之於心乃有龍燭銜花金鑪浮氣月落桂垂星斜柳
墜猶豫樞機嫌疑涇渭顧望迴惑心情怖畏應對坎而
衝離忽當申而取未

鏡賦

天河漸沒日輪將起燕噪吳王烏驚御史玉花簾上金
蓮帳裡始摺屏風新開戶扇朝光晃眼早風吹面臨桁

下而牽衫就箱邊而著釧宿鬟尚捲殘粧已薄無復脣
朱纔餘眉萼靨上星稀黃中月落鏡臺銀帶本出魏宮
能橫却月巧挂迴風龍垂匣外鳳倚花中鏡迺照膽照
心難逢難值鏤五色之蟠龍刻千年之古字山雞看而
獨舞海鳥見而孤鳴臨水則池中月出照日則壁上菱
生暫設裝奩還抽鏡屣競學生情爭憐今世鬢齊故略
眉平猶剃飛花塼子次第須安朱開錦踰黛煎油檀脂
酥甲煎澤漬香蘭量髻鬢之長短度安花之相去懸媚

子於搔頭拭釵梁于粉絮梳頭新罷照著衣還從粧處
取將歸暫看絃繁懸知纈縵衫正身長裾斜假擗真成
個鏡特相宜不能片時藏匣裏暫出園中也自隨

燈賦

九龍將暝三爵行棲瓊鈎半上若木全低窻藏明於粉
壁柳助暗於蘭閨翡翠珠被流蘇羽帳舒屈膝之屏風
掩芙蓉之行障卷衣秦后之牀送枕荆臺之上乃有百
枝同樹四照連盤香添然蜜氣雜燒蘭燼長宵久光青

夜寒秀華掩映蛻膏照灼動鱗甲於鯨魚燄光芒於鳴
鶴蛾飄則碎花亂下風起則流星細落况復上蘭深夜
中山醕清楚妃留客韓娥合聲低歌著節游絃絕鳴輝
輝朱燼焰焰紅榮乍九光而連彩或雙花而並明寄言
蘇季子應知餘照情

對燭賦

龍沙雁塞甲應寒天山月沒客衣單燈前桁衣疑不亮
月下穿針覺最難刺取燈花持桂燭還却燈檠下燭盤

鑄鳳銜蓮圖龍並眠燼高疑數翦心濕暫難然銅荷承
淚蠟鐵缺染浮烟本知雪光能映紙復訝燈花今得錢
蓮帳寒檠窓拂曙筠籠熏火香盈絮傍垂細溜上繞飛
蛾光清寒入燄暗風過楚人纓脫盡燕君書誤多夜風
吹香氣隨鬱金苑芙蓉池秦皇辟惡不足道漢武胡香
何物奇晚星沒芳蕪歇還持照夜遊詎減西園月

枯樹賦

殷仲文風流儒雅海內知名代異時移出為東陽太守

常忽忽不樂顧庭槐而嘆曰此樹婆娑生意盡矣至如
白鹿貞松青牛文梓根柢盤魄山崖表裏桂何事而銷
亡桐何為而半死昔之三河徙殖九畹移根開花建始
之殿落實睢陽之園聲含嶰谷曲抱雲門將雛集鳳比
翼巢駕臨風亭而唳鶴對月峽而吟猿乃有拳曲擁腫
盤坳反覆熊彪顧盼魚龍起伏節豎山連文橫水蹙匠
石驚眎公輸眩目雕鐫始就剗剗仍加平麟鏹甲落角
摧牙重重碎錦片片真花紛披草樹散亂烟霞若夫松

子古度平仲君遷森梢百頃槎枿千年秦則大夫受職
漢則將軍坐馬莫不苔埋菌壓鳥剥蟲穿低垂於霜露
撼頓于風烟東海有白木之廟西河有枯桑之社北陸
以楊葉為闕南陵以梅根作冶小山則叢桂留人扶風
則長松繫馬豈獨城臨細柳之上塞落桃林之下若乃
山河阻絕飄零離別拔本垂淚傷根瀝血火入空心膏
流斷節橫洞口而歌卧頓山腰而半折文衰者合體俱
碎理正者中心直裂戴癭銜瘤藏穿抱穴木魅暘睽山

精妖孽况復風雲不感羈旅無歸未能採葛還成食薇
沈淪窮巷蕪沒荆扉既傷搖落彌嗟變衰淮南云木葉
落長年悲斯之謂矣乃為歌曰建章三月火黃河千里
槎若非金谷滿園樹即是河陽一縣花桓大司馬聞而
嘆曰昔年移柳依依漢南今看搖落悽愴江潭樹猶如
此人何以堪

駕鵞賦

虞姬小來事魏王自有歌聲足繞梁何曾織錦未肯挑

桑終歸薄命著罷空牀見鴛鴦之相學還歌眼而淚落
南陽漬粉不復看京兆新眉遂嬾約况復雙心並翼馴
狎池龍浮波弄影刷羽乘風共飛檐瓦全開魏宮俱棲
梓樹堪是韓馮若乃韓壽欲婚溫嶠願婦玉臺不送胡
香未有必見此之雙飛覺空牀之難守

表

賀傳位皇太子表

臣某言伏見二月十九日詔傳位於皇太子昔者降居

弱水登庸有優劣之殊來朝櫟陽繼體有君臣之異不得與夫天之兩日日之再中並曜聯輝重明雙照同年而語矣伏惟天元皇帝惟聖作聖惟親尊親降意于與能鳴謙於神器欲令百工相和先聞揖讓之風天下無為早識吾君之子是以運獨見之明行非常之事先天不違後天而奉皇太子身貞萬國道照四門夙膺再命之符實允基天之命非闕復子明辟異於遷虞事夏既損既益尚或二天為離為火何妨兩日且平陽蒲坂賢

臣則二十五人額頊高辛才子則一十六族與此計事
何遽無成龔乎鼓之軒乎舞之自當八風通慶雲聚五
老同遊三星運曜豈直雙龍再賜九雉重飛而已哉皇
帝藐然姑射正當乘雲馭龍開道崆峒豈復先秋木落
臣生預堯年時逢舜日覩維新之慶實倍萬恒情

賀平鄴都表

泰山梁甫以來即有七十二代龍圖龜書之後又已三
千餘年雖復制法樹司禮殊樂異至於文離武落剡木

弦弧席卷天下之心包含八荒之志其揆一矣伏惟陛下握天樞秉地軸駕馭風雲驅馳龍虎沈雄內斷不勞謀於力牧天策勇決無待問於容成是以威風所振烈火之遇鴻毛旗鼓所臨衝風之卷秋葉竊聞伊洛戎夷幽并僭偽抱圖載籍已歸丞相之府銜玉繫綬並詣中軍之營百年逋誅遂窮巢窟三代敵怨俄然掃蕩昔周王鮪水之師尚勞再駕軒轅上谷之戰猶須九伐未有一朝指麾獨決神慮平定寓內光宅天下二十八宿止

餘吳越一星千二百國裁漏麟洲小水若夫咸康之年
四方始定建武之代諸侯並朝不得同年而語矣雖復
八風並唱未足頌其英聲六樂俱陳無以歌其神武坐
釣臺而誓衆如啟繼夏禹之功入商郊而問罪姬發成
周文之志此無改之道大孝也歟當今鹿臺已散離宮
已遷兵藏武庫馬入華山立明堂之制奏大武之樂盛
矣哉上天降休未之有也政須東南一尉立于比景之
南西北一候置于交河之北然後命東后詔蒼冥衢壇

琬碑銀繩瓊檢告厥成功差無慚德臣忝竊榮幸莅政東藩不獲躬到闕庭預觀大慶不勝鳬藻踴躍之至謹遣主簿曹敏奉表以聞

賀新樂表

臣聞天地順動則雷出為豫聖人成功則風行有節故六德在咸池之宮山谷可調八風入承雲之奏人神不雜我太祖文皇帝體國經野設官分職變魏作周移風正雅衣裳而朝萬國珪璧而會諸侯至如經綸圖籍校

謦烟燼樂正無缺章秩宗無廢典豈但商頌十篇得諸
太師之室虞書五禮取於恭王之宮伏惟皇帝以下武
嗣興中陽繼業運日月之明動淵泉之慮律厯著微無
煩于太史陰陽晷度躬定於天官故得參考八音研精
六代封晉魏為二王序殷周為三恪雖復朱干玉戚尚
識典刑素韞纁裳猶因雄據未若山雲特起八卦成形
鳳凰於飛九州觀德改金奏于八列合天元于六舞聲
含擊石更入登歌調起初鐘還叅玉管足以感天地而

通神明康帝德而光玄象昔者齋居玄扈為曲在於雲
門師度盟津習舞歸於山立遂乃包括三名克諧一代
作者之謂聖天之所啓乎豈惟路鼓靈鼗空桑孤竹廣
矣大矣輪焉奐焉是知零陵孝廉空傳玉管始平太守
虛稱銅尺臣等並預鈞天同觀張樂軒墀弘敞欄檻眺
聽崇牙業業猛蕙越越翠鳳揚旌靈鼉樹鼓杳冥雲霧
蕩薄丘陵醴泉與甘露同飛赤雁與斑麟俱下聘魯請
觀理當見其盛德適齊忘味定是知其盡美昔淵魚聽

曲尚得聳鱗櫪馬聞絃猶能仰秣臣等誠愧知音敢忘
悅豫若使詳其音律是所邈然但能記其鏗鏘於茲為
幸不勝慶悅之誠謹詣朝堂奉表以聞

請功臣襲封表

臣聞以法施民必傳祀典以勞定國必有承家孫叔敖
祭酹無聞有傷良相女叔齊肩嗣絕沒實貶賢臣謹案
大統十六年詔先有封爵死於王事絕嗣者聽以支子
繼襲非死王事不許承封前牒五等功臣皆是勤勞王

室身當患難扞禦災禍翼贊大猷一日遇疾身捐館舍不幸無肩享祀便絕於禮則不足於義則有傷未求上林之獵已削其侯不服襜褕之衣先除其國伏惟皇帝崇德旌庸興亡繼絕聞鼓輦而思將帥畫雲臺而念舊臣豈有功存社稷而無後可守事盡忠貞而無祠可祭周於蕃屏為約事在世功漢以山河為誓義存長久臣聞存人之國大於救人之災立人之後重於封人之墓竊以殷朝繼及無廢小宗周室興亡貴存身後紹高密

者累葉豈專鄧禹之正肩嗣平陽者重世何必曹參之
嫡孫愚謂生有其勞死非王事雖在支庶並聽承襲幸
使伯有之魂不能為厲若教之鬼其無餒而幽顯對揚
人神咫尺

為杞公讓宗師驃騎表

臣某言伏見詔書以臣為使持節驃騎大將軍開府儀
同三司宗師中大夫伏奉綸言心魂震警臣聞堯分四
岳是以望秩山川舜命九官是以光華日月必須儀刑

以德明試以功乃可協和萬邦咸熙庶績臣幼無學植
長闕裁成鴻都之門不能定其章句難鹿之塞無以名
其碑碣憑天潢之派水附若木之分枝東岳則朝宿有
名南宮則門闌有籍在臣庸劣久知滿盈武陽以功臣
之重特拜宗師東平以母弟之尊超登上將臣有何德
能兼此榮臣早傾庭蔭曾未扶牆母氏慈訓哀矜勞苦
甫及成人復垂捐棄几筵如在忍離鞠養之恩終天無
報叩地難任欲草土丘陵終身瑩域霜露申履時之感

燕雀展迴翔之心不悟天澤沛然謬垂提拔當今玉燭
調和既非金革之世璿璣齊政豈忘松檟之餘况復一
枝蹉曲終危九層之臺一股涔蹄必傷千里之駕皇帝
欽明文思光宅區宇禮格四方無容奪臣此志孝治天
下自當哀臣此情太宗為師更求同姓之國元戎叅乘
別選能賢之臣伏願覽青蒲之奏曲允徽誠詔鳳凰之
池特收嚴召則天慈無濫私願獲從臣之容身便當有
地不任荒悚戰懼之誠謹詣朝堂奉表以聞

為閩大將軍乞致仕表

臣聞禮云大夫七十致仕於朝傳家於子膳則貳珍衣
稱時制臣自出身奉國四十餘年遭遇風雲從微至著
太祖文皇帝扶危濟難奄有關河臣實無堪中涓從事
自洛食風塵河梁旗鼓華陰有白馬之兵河曲有黃沙
之陣臣雖用命不能奇策功薄賞厚因人成事恩澤年
表常以愧心仰逢周朝以揖讓登庸謳歌受命主貴臣
遷頻煩榮寵三槐以鑄鼎象物知其神姦五等以桓珪

飾瑞守其宮室臣以何德兼而有之況復水土之職王
梁以應讖受徵兵戈之王韓信以登壇獨拜語其連類
臣又何人當今四海未寧三方鼎峙陛下勞心之日羣
公展効之秋而臣甲子既多耄年又及無叅賓客之事
謬達諸侯之班尸祿素餐久紊彝典負乘致寇徒煩有
司加以寒暑乖違節宣失序風木交侵菁華已竭雖復
庶頗強飯馬援據鞍求欲報恩何能為役榮啓期之樂
適足自貽燭之武之言無能為也特乞解所居官言從

初服事符骸骨之請非謀几杖之賜若臣北陵移病東
臯歸老山河茅社一反司勳公侯珪璧還封典瑞則朝
無冒位之人臣免妨賢之責虞氏養老敢希東序之榮
周朝如荼豈望西郊之禮但瞻仰天威方違咫尺徘徊
城闕私增悽戀不任知止之情

代人乞致仕表

臣聞一葉將隕寧待於風露百川皆到自竭者潢汚臣
輒感之以悲以咽臣某中謝臣仲春之末舊患漸加雙

足頗蹇四支不利扶步有邯鄲之失勉視無離婁之明
安可率此留務溷茲恒典陛下恩周曲成未忍捐棄微
臣困至于亟轉不堪勝臣所以自咎自傷淚繼之血臣
特承先緒進不因人陛下憫臣無用舉直而有慙自奉
圖太極宣綽中書陛下收臣於一心任臣以獨掌九年
冀登宰輔八歲載踐宗伯出擁干旄入叅衡鏡或雲臺
之上微臣預疇咨之旨或日觀之下詔臣操刊勒之文
美而暢之臣實尤忝明憲不敢以纖負玄造竟微于滴

助日月具逾冰炭交集誠懷伏以前陪政事親荷德
音謂臣等經侍軒墀子孫尚延保護臣荷螻蟻炊戴
丘山臣宜生亦盡命死且陳力竊不知終而不知止
朝列三數與臣同儕臣未六十推臣則幼獨臣彌當
頓頓病不俟年盈量窮涯滿而招損逾時每乖于勿
藥永日猶繫于苞桑覽分必然貪榮所忌伏乞免臣見
職退畢餘生察臣榮不可支矜臣分不能強迺臣之幸
也豈悟仁壽之聞有此一時承明之廬無緣再謁心神

已弊晷刻增悲叨睿鑒則多士莫先違聖顏則小臣何
遠惟冀三條啓道萬乘巡京悅西怨之羣黎逮東封之
從者危魂倘駐枯骨如存是臣之愜非臣所望臣又聞
驅奔効駕先輟于羸駘翔集賀成近遺於鍛翮彼尚知
暮而況臣哉聞未遑請臣之懇戀至於隳官臣合書罪
為晉陽公進玉律秤尺斗升表

臣聞三才既立君臣之道已陳六位時成禮樂之功斯
正故以叶和日月測度陰陽悅豫兆人儀刑萬國者也

伏惟皇帝應籙馭天披圖受命據太陽而懸像履文昌
而建極白環表讓德之符玄珪告成功之瑞太階既平
升中可習必當水逮千年山稱萬歲伏見勅旨刊正音
律平章厯象奏黃鐘而歌大呂變孤竹而舞雲門莫不
器取疎通聲從安樂四分既明三微是定是以聞鐘洛
浦即辨聲乖聽鐸邯鄲先知響韻二分二至行于司厯
之官九變九成被於和樂之職足以動天地感鬼神化
被風俗平分寒暑豈直吟嘯谿谷回翔鸞鳳而已哉是

知零陵廟前徒尋舜管始平城下空論周尺臣聞上製
其禮下習其儀君定其法臣行其事謹造玉律一具并
玉秤尺斗升合等始得成功至于分粟累黍量絲數籥
實以仰稟聖規叅詳神思所冀節移陰管無勞河內之
灰氣動陽鍾不待金門之竹而琬琰事輕般倕慮淺不
足展采成均增輝度量齋器奉表以聞

進象經賦表

臣某言臣伏讀聖製象經并觀象戲私心踴躍不勝抃

舞伏以性與天道本絕尋求直以懸諸日月遂獲瞻仰
九州既奠近對河圖四轍中繩全觀玉策未飛玄鶴先
聞金石之聲不上赤城獨見烟霞之氣置管而測光景
愈高沈玉而觀淵泉益遠寢不自涯課虛為賦詞非寥
亮學無雕刻遂敢陳述誠為厚顏况復日之遠近本非
童子所問天之渾蓋豈是書生所談冒用奏聞伏增流
汗之至

齊王進蒼鳥表

臣聞飛南陽之雉尚闡霸圖下建章之鵠猶調和氣况
乃虞庭告瑞姬社呈祥咸高識哺之心實貴能知之性
伏惟皇帝陛下德教百姓孝刑四海攝提從紀天下文
明是以東海輸禽乍改黔質西山度羽或變蒼精臣去
月三十日行到陝州獲大都督莫仁回樂列稱於州射
堂內見一蒼鳥林薄回翔循環不去駐乘木之精轉司
風之翼斯實禮敬所覃孝慈之感理宜歸瑞秘圖書祥
帝冊用光至德取効升平無令赤鳳留止偏為瘞玉之

歌玄鶴徘徊獨擅銜珠之舞

齊王進白兔表

臣聞輿圖欲遠則玉虎晨鳴轍迹方開則銀麋入貢伏
惟陛下明明在上翼翼居尊德動天闕威移地軸是以
風烟照燭毛羽禎祥史不絕書府無虛日臣受脈元戎
用綏邊鄙棘門所屆始次熊山前茅慮無乃獲白兔光
鮮越雉色麗秦狐月德符徵金精表瑞呈祥輿頌効異
披圖尊敬之迹既明應事之機斯兆臣之龔行實從陝

略瑞以素質彌雄西氣庶重承廟算方事申威揜代偃
齊分韓裂趙不任鳧藻踴躍之情

齊王進赤雀表

臣聞南陽雉飛尚論秦霸建章鵠下猶明漢德當今天
不愛寶地必呈祥自應長樂觀符文昌啓瑞伏惟皇帝
欽明文思劬勞成務歷象日月允釐百工海水無波天
星不動去四月十三日獲隴右符府叅軍李暉牒稱戶
屬秦州清水郡伯陽縣文谷林在家庭獲一赤雀光同

朱鳳色類丹鳥降火飛精似入公車之府流金成製若
上凌雲之臺謹按赤雀銜書止于鄴戶周之受命興乎
此祥即事所觀同符合契實可圖形瑞譜書頌儒林事
足成臺名堪紀號豈直雲中太守見赤心之奉主蓬萊
童子知白環之報恩臣等預觀休徵情迫恒慶不任覓
藻之至

啓

謝滕王集序啓

信啓伏覽制垂賜集序紫微懸映如傳闕里之書青鳥
遙蜚似送層城之壁若夫甘泉宮裏玉樹一叢玄武闕
前明珠六寸不得譬此光芒方斯燭照有節有度即是
能平八風愈唱愈高殆欲去天三尺殿下雄才蓋代逸
氣橫雲濟北顏淵關西孔子譬其毫翰則風雨爭蜚論
其文采則魚龍百變蒲桃繞館新開碣石之宮修竹夾
池始作睢陽之苑瑠璃汎酒鸚鵡承杯鳳穴歌聲鸞林
舞曲况復行雲逐雨迴雪隨風湖陽之尉既成為喜之

因舂陵之侯便是積慶之地信本乏材用無多述作加以建鄴陽九劣免儒劓江陵百六幾從士隴至如殘編落簡並入塵埃赤軸青箱多從灰燼比年痾恙彌留光陰視息桑榆已逼蒲柳方衰不無秋氣之悲實有窮途之恨是以精采簪亂頗同宋玉言辭褰吃更甚揚雄一吟一詠其可知矣好事者不求知音者不用非有班超之志遂以棄筆未見陸機之文久同燒硯至于凋零之後殘缺所餘又已雜用補袍隨時覆醬聖慈憐愍遂垂

存錄始知逾揚過差君子失辭比擬縱橫小人迷惑荆
玉抵雀正恐輕用重寶龍淵削玉豈不徒勞神慮匠石
回顧朽材變于彫梁絲陽一言奔蹄成於駿馬故知假
人延譽重于連城借人羽毛榮於尺玉溟池九萬里無
踰此澤之深華山五千仞終愧斯恩之重即日金門細
管未動春灰石壁輕雷尚藏冬蟄伏願聖躬與時納豫
南陽寶雉幸足觀瞻酈縣菊泉差能延壽伏遲至鄴可
期從梁有日同杞子之盟會必欲瞻仰風塵共薛侯而

來朝謹當逢迎冠蓋魚腸尺素雁足數行書此謝辭終
知不盡謹啓

謝周明帝賜絲布等啓

臣某啟奉勅垂賜雜色絲布綿絹等三十段銀錢二百
文某比年以來殊有闕乏白社之內拂草看氷靈臺之
中吹塵視甌懟妻狠妾既嗟且憎瘠子羸孫虛恭實怨
王人忽降大賚先臨天帝賜年無踰此樂仙童贈藥未
均斯喜張袖而舞玄鶴欲來撫節而歌行雲幾斷所謂

舟楫無岸海若為之反風薺麥將枯山靈為之出雨况
復全抽素繭雪坂疑傾併落青鳬銀山或動是知青牛
道士更延將盡之命白鹿真人能生已枯之骨雖復拔
山超海負德未勝垂露懸針書恩不盡蓬萊謝恩之雀
白玉四環漢水報德之蛇明珠一寸某之觀此寧無愧
心直以物受其生於天不謝謹啟

答趙王啟

某啟仰承張幕全韓連營上地澠池置陣解鄧禹之圍

函谷開關削王元之印蜂旗朝上刁斗夜鳴彌雄壯士
之心足起橫行之志况復才人出娉還得賢夫塞外有
夫人之城軍中有女子之氣都尉青旗即時春色將軍
大樹已復花開雲氣浮壘流星汎枕細舞長歌橫簫直
笛當乎此時青雲之上信不學無術本分泥沈忽逢天
造搜揚仄陋今者遂總憲司預聞刊鼎獻歲刑書既應
懸法上春木鐸方須徇人但年髮已秋性靈久竭嘉石
肺石無以測量舌端鼻端惟知繁擁垂展一月遂涉兩

年傾首東瞻山河千里風塵未盡霜露沾衣仰願珍宜
以為身寶謹啓

謝趙王示新詩啓

某啓鄭叡至奉手教累紙并示新詩八體六文足驚毫
翰四始六義實動性靈落落詞高飄飄意遠文異水而
湧泉筆非秋而垂露藏之山嵒可使雲霧鬱起濟之江
浦必當蛟龍繞船首夏清和聖躬怡裕琉璃彫管鵲顧
鸞迴婉轉綠沈猿驚雁落下風傾首以日為年捷為舍

人實有誠願碧雞主簿無繇遂心寂寞荆扉踈蕪蘭徑
驟駕來梁未期卜日遣騎到鄴希垂枉道

謝趙王賚絲布等啓

某啓鄭叡至蒙賜絲布綾等十段王褒至又賜許賜錢
等望外之恩實符大賚非常之錫乃溢生涯曳練且觀
無勞白馬之望流泉欲委佇見青鳬之蜚楊池掘荷李
園移樹既欣谷利彌思青林陳留下粟有媿深恩櫟陽
雨金翻慙曲施靈臺久客從此數炊黍谷長寒於今更

暖從雲夢之田不喻此樂得豐城之劍未均斯喜謹啓

謝趙王賚絲布啓

某啓奉教垂賚雜色絲布三十段去冬凝閉今春嚴勁
霰似瓊田淩如鹽浦張超之壁未足障風袁安之門無
人開雪覆烏毛而不暖然獸炭而逾寒遠降聖慈曲垂
矜賑諭其蠶月殆罄桑車津實秉杼幾空織室遂令新
市數錢忽疑販綵平陵月夜驚聞擣衣妾遇新纈自然
心伏妻聞裂帛方當含笑莊周車轍實有涸魚信陵鞭

前元非窮鳥仰蒙經濟伏荷深慈謹啓

又謝趙王賚息絲布啓

某啓某息荀娘昨蒙恩引曲賜絲布等五段南冠獲宥
既預禮延稚子勝衣還蒙拜謁闕尹津梁之織鄴地雙
絲扶風彩文之機仙園獨璽青矜宜襲書生無廢學之
詩春服既成童子得雩沂之舞况復栖鳥挾子同知桂
樹之恩澤雄將雛共喜行春之令根株一潤枝葉俱榮
謹啓

謝趙王賁犀帶等啓

某啓奉教垂賚犀裝帶錢十貫魏君寶帶特賜劉楨趙
王國租偏資裴楷貫藏文馬如燒安息之銀帶插通犀
似獵雲南之獸北郭騷之長貧是所甘悵南宮敬之載
寶殊非念望花開四照惟見其榮鼇戴三山深知其重
昔沈義將盡逢司命而還生士燮行埋值仙人而更活
今日慈矜斯之謂矣馬前驅而導路或以識恩雞未曉
而開闕容能報主謹啓

謝滕王賚巾啓

某啓奉教垂賜鹿子巾一枚解角新胎戴藤初朶落星
交映連珠踈點盤龍之刀既剪長命之縷仍縫翠羽懸
推芙蓉高讓遊斯隱士足笑鼓皮入彼春林方誇筍籜
某蓬鬢鬆颯衰容者朽三秋不沐實荷今恩十年一冠
彌欣此賚謹啓

謝趙王賚白羅袍袴啓

某啓垂賚白羅袍袴一具程據上表空論雉頭王恭入

雪虛稱鶴氅未有懸機巧縹變躡奇文鳳不去而恒飛
花雖寒而不落披千金之暫暖棄百結之長寒永無黃
葛之嗟方見青綾之重對天山之積雪尚得開衿冒廣
厦之長風猶當揮汗白龜報主終自無期黃雀謝恩竟
知何日

謝趙王賚米啓

某啓奉教垂賚米十石丹烏銜糴既集西周黃雀隨車
還蜚東市漬而為種不無霜雪之精取以論兵即有山

川之勢某陋巷簞瓢拂風沐雨剥榆皮於秋塞握蟄燕
于寒山仰費國租遂開塵甑非丹竈而流珠異荆臺而
炊玉東方朔之捧米既息長飢西門豹之懇田方慚此
賚

謝趙王賚乾魚啓

某啓蒙賚乾魚十番醴水朝浮光疑朱鼈文鯨夜觸翼
似青鸞况復洞庭鮮鮓溫河美鯽波瀾成雨鱗甲防寒
某本吳人常想江湖之味及其飢也惟資藜藿之餘慈

賚渥恩膏腴流竈不勞獅子之亭即勝雷池之長翻驚
河伯獨不受人足笑任公終年垂釣謹啓

謝趙王賚雉啓

夏翟秋飛江輦春潤中牟縣之客遂得坐觀賈大夫之
妻已應含笑仰費中厨來供下客山川道遠口腹知恩
謝趙王賚馬并繖啓

某啓奉教垂賚紫駟馬并銀釘乘具紫紬繖一張上天
降雨特垂深澤若水流光偏蒙私照迴茲翠蓋事重劉

基之恩降此青驪榮深李忠之賜北部丹帷便須高捲
西河竹馬即已郊迎在命之輕鴻毛浮于弱水知恩之
重黿背負于靈山况復驚鴻別水但見徘徊黃鶴去闕
惟知反顧棲戀之心事同於此

謝滕王賚馬啓

某啓奉教垂賚烏騮馬一匹柳谷未開翻逢紫燕臨源
猶遠忽見桃花流電爭光浮雲連影張敞畫眉之暇直
走章臺王濟飲酒之歡長駟金埒謹啓

謝滕王賚猪啓

某啓奉教垂賚肥豕一腔白腹見珍度遼東之水赤欄
為重對襄陽之城忽降全恩謹充炮烙孫弘牧於淄水
惟以求錢卜式養于上林豈知其味謹啓

書

為梁上黃侯世子與婦書

昔仙人導引尚刻三秋神女將梳猶期九日未有龍飛
劍匣鶴別琴臺莫不銜怨而心悲聞猿而下淚人非新

市何處尋家別異邯鄲那應知路想鏡中看影當不舍
啼欄外將花居然俱笑分杯帳裡却扇床前故是不思
何時能憶當學海神逐潮風而來往勿如織女待填河
而相見

移文

移齊河陽執事文

周天和四年四月二十七使持節車騎大將軍儀同三
司大都督陝西總管府移齊河陽執事自疆場卧鼓邊

鄙收烽義讓之行未能朞月孔誠誨盜即值包藏是以
板載之師須時而動自安封域非求拒防雖復風塵暫
接旗鼓無侵五將即迴雙嶠已靜始奉朝旨獲被移書
令受叛城使迴軍實想彼邊司已奉處分既有此還輒
須領納未知何日可遣戍兵指附行人遲能速報盟且
不渝隣境相善顧瞻原野幸甚實多故移

又移齊河陽執事文

周天和四年十一月十日陝州總管長史梁昕移齊河

陽執事自拭玉繼書通關去傳實謂上方銷劍山陽息
馬過茲禦容或慢重局屬司疆陰行善盜君一臣二上
穆下乖國家以邊鄙心搖須固備守大司馬齊國公天
子介弟中軍元帥駕馭孫吳驅馳貔虎舉因農隙義興
城郎師巡我境曾非反郛縮載之畢前旗已迴彼國兵
馬不防殿後餘塵遂至相接建旌壘上未及五中安鄴
城傍先驚七伏當時鋒刃或膏原野所獲彼將夏州刺
史梁老首領今以相還尸鄉不遠無令久客馬驢甲兵

具條相勒封人宜依領納宿無鬪志不獲交綏致此埃
塵誰階其咎故移

移虜留使文

年月朔日某官告配某州郡前本欲發遣彼使但某入
境以來國祥甫通自秋迄冬未申款接且狼星表邦嚴
霜已戒浮河亂濟長路苦寒時當獻歲惟新三元告慶
珪贄盈庭華裔參軫式觀盛禮洽此嘉譙陽和既動澤
漸萬邦便當遣使相隨永敦鄰睦故移

教

答移市教

昔張楷碩儒尚移弘農之市宜官妙篆猶致酒壚之客
况復德總郇周聲高梁楚希風慕義之士舉袂成帷卧
轍反車之流摩肩相接遂使王充閱市之處遠出荒郊
石苞販鐵之所翻臨崖岸聖德謙虛未忘諠湫欲令吹
蕭舞鶴還反舊鄆賣卜屠羊請辭新闕而交貿之黨好
留幽岐之衆難遣

連珠

擬連珠四十四首

蓋聞經天緯地之才拔山超海之力戰陣勇於風飈謀
謨出乎胸臆斬長鯨之鱗截飛虎之翼是以一怒而諸
侯懼安居而天下息

蓋聞蕭曹贊務雄略所資魯衛前驅威風所假是以黃
池之會可以爭長諸侯鴻溝之盟可以中分天下

蓋聞解封豕之結塞長蛇之源必須製裳千里啖血輶

門是以開百里之圍用陳平之一策盟千乘之國須季路之一言

蓋聞得賢斯在不藉揮鋒股肱良哉無論應變是以屈完叅乘諸侯解方城之圍干木為臣天下無西河之戰蓋聞邯鄲已危徒思馬服薊城去矣空用荆軻是以竹杖扶危不能正武擔之石蘆灰縮水不能救宣房之河蓋聞穴蟻衝泉未知遠慮玄禽巢幕何能支久是以大厦既焚不可灑之以淚長河一決不可障之以手

蓋聞膏肓喋喋市井營營或以如簧自進或以狙詐相傾是以子貢使乎五都交亂張儀見用六國縱橫

蓋聞謀猷是習權變須長時增齊竈或卧燕牆是以井陘之兵如鴻毛之遇火長平之卒若秋草之中霜

蓋聞彼泰離離大夫有喪亂之感麥秀漸漸君子有去國之悲是以建章低昂不得猶瞻灞岸德陽淪沒非復能臨偃師

蓋聞市朝遷貿山川悠遠是以狐兔所處由來建始之

宮荊棘參天昔日長洲之苑

蓋聞天方薦瘥喪亂弘多空思說劍徒聞枕戈是以劉琨之英略莫知自免祖逖之慷慨裁能渡河

蓋聞穀林長遠蒼梧不從惟桐惟葛無樹無封是以隨珠日月無益驪山之火雀臺絃管空望西陵之松

蓋聞雷驚獸駭電激風驅陵歷關塞枕跨江湖是以城形月偃陣氣雲鋪非綠林之散卒即驪山之叛徒

蓋聞死別長城生離函谷遼東寡婦之悲代郡孀妻之

哭是以流慟所感還崩杞梁之城灑淚所沾終變湘陵
之竹

蓋聞三世用兵既非貽厥陰謀累葉必以凶終是以李
都尉之風霜上蘭山而箭盡陸平原之意氣登河橋而
路窮

蓋聞營魂不反燐火宵飛時遭獵夜之兵或斃空亭之
鬼是以射聲營之風雨時有冤魂廣莫郡之陰寒偏多
夜哭

蓋聞江黃戎馬之微鄢郢風颭之格乍有去而不歸或
無期而遠客是以章華之下必有思子之臺雲夢之傍
應多望夫之石

蓋聞無怨生離恩情中絕空思出水之蓮無復迴風之
雪是以樓中對酒而綠珠前去帳裏悲歌而虞姬永別
蓋聞樹彼司牧既懸百姓之命及乎厭世復傾天下之
心是以一馬之奔無一毛而不動一舟之覆無一物而
不沈

蓋聞嚴霜之零無所不肅長林之斃無所不標是以楚
塹既填遊魚無託吳宮已火歸燕何巢

蓋聞名高八俊傷於閹豎之黨智周三傑斃于婦女之
計是以洪澤之蛟遂挫長飢之虎平皋之蟻能摧失水
之龍

蓋聞吳艘蜀艇不能無水而浮以紅間綠不能無弦而
射是以龍樊之鶴寧有六翮之期骭髀之馬無復千金
之價

蓋聞性靈屈折鬱抑不揚乍感無情或傷非類是以嗟
怨之水特結憤泉感哀之雲偏含愁氣

蓋聞遷移白羽流徙房陵離家折里悽恨撫膺是以吳
起之去西河潸然出涕荆軻之別燕市悲不自勝

蓋聞廉將軍之客館翟廷尉之高門盈虛倏忽貴賤何
論是以平生故人灌夫不去門下賓客任安獨存

蓋聞執珪事楚博士留秦晉陽思歸之客臨淄羈旅之
臣是以親友會同不妨懷撫悽愴山河離異不妨風月

閩人

蓋聞五十之年壯情久歇憂能傷人故其哀矣是以譬之交讓實半死而言生如彼梧桐雖殘生而猶死

蓋聞秋之為氣惆悵自憐耿恭之悲踈勒班超之念酒泉是以韓非客秦避讒無路信陵在趙思歸有年

蓋聞懸鶉百結知命不憂十日一炊無時何恥是以素王之業乃東門之貧民孤竹之君實西山之飢士

蓋聞胸中無學猶手中無錢今之學也未見能賢是以

扶風之高鳳無故棄麥中牟之甯越徒勞不眠

蓋聞十室之邑忠信在焉五步之內芬芳可錄是以日南枯蚌猶含明月之珠龍門死樹尚抱咸池之曲

蓋聞百尺之高累于九碁之上千鈞之重懸于一木之枝是以履虎尾而非險傷龍鱗而未危

蓋聞居蘭處鮑在其所習白羽素絲隨其所染是以金性雖質處劒即凶水德雖平經風即險

蓋聞豫章七年斃于豐草芳蘭九畹淪于幽谷是以欲

求其真晉陽有自理之蒿若賞其聲吳亭有已枯之竹
蓋聞明鏡蒸食未為得所干將補履尤可傷嗟是以氣
足凌雲不應止為武騎才堪王佐不應直放長沙

蓋聞勢之所歸威之所假必能繫風捕影暴虎馮河是
以輕則鴻毛沈水重則磐石陵波

蓋聞意氣難干非資扛鼎風神自勇無待翹關是以曹
劌登壇汶陽之田遽反相如晚柱連城之壁更還

蓋聞卷施不死誰必有心甘蕉自長故知無節是以螺

蚌得路恐異驪淵雀鼠同歸應非丹穴

蓋聞北邙之高魏君不能削穀洛之鬪周王不能改是以愚公何德遂荷鍤而移山精衛何禽欲銜石而塞海蓋聞君子無其道則不能有其財忘其貧則不能恥其食是以顏回瓢飲賢慶封之玉杯子思銀珮美虞公之垂棘

蓋聞水之激也實濁其源木之蠹也將拔其根是以延年之家預論掃墓羊舌之族先知滅門

蓋聞磨礪脣吻脂膏齒牙臨風扇毒向影吹沙是以敬而遠之豺有五子吁可畏也鬼有一車

蓋聞虛舟不忤令德無虞忠信為琴瑟仁義為庖廚是以從莊生則萬物自細歸老氏則衆有皆無

蓋聞三關頓足長城垂翅既羈既旅非才非智是以烏江艤檝知無路可歸白雁抱書定無家可寄



漢魏六朝百三家集卷一百十一上